

**Broj: UP1-06-13-1-107-1/23**  
**Mostar, 15.06.2023. godine**

Na osnovu člana 21. stav (1) tačka 9), člana 37., člana 84. stav (3) i člana 87. stav (2) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13, 94/15, 54/19, 1/22 i 61/22), člana 10., člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 8. stav (1), člana 32. stav (4) i člana 46. Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14, 31/16 i 84/19), člana 78. Pravilnika o javnim raspravama i rješavanju zahtjeva, sporova i žalbi („Službene novine Federacije BiH“ broj 57/12, 71/14 i 31/16), člana 38., člana 42. stav (1) tačka c) i tačka h) i člana 43. stav (2) Pravilnika za izdavanje dozvola („Službene novine Federacije BiH“ broj 2/17, 39/20, 82/21 i 1/23), člana 17. i člana 21. tačka a) Pravilnika o sticanju statusa kvalifikovanog proizvođača električne energije („Službene novine Federacije BiH“ broj 53/14), člana 9a. Pravilnika o metodologiji i načinu obračuna regulatornih naknada za imaoce dozvola – Prečišćeni tekst („Službene novine Federacije BiH“ broj 94/19 i 1/23), postupajući po službenoj dužnosti u postupku oduzimanja Dozvole za rad za proizvodnju električne energije broj 06-03-994/19 imaoce dozvole „NINO-HA“ d.o.o. Doboj Jug, Mravići bb, Mravići - Doboj Jug, zastupanog po zakonskom zastupniku Atifu Hodžiću, Regulatorna komisija za energiju u Federaciji Bosne i Hercegovine – FERK je 15.06.2023. godine na XIII redovnoj sjednici donijela sljedeće

### **RJEŠENJE** **o oduzimanju dozvole**

1. Imaocu dozvole „NINO-HA“ d.o.o. Doboj Jug oduzima se Dozvola za rad za proizvodnju električne energije broj 06-03-994/19, izdata Rješenjem broj 06-03-994-06/19 od 06.02.2020. godine, sa periodom važenja od 06.02.2020. godine do 05.02.2030. godine.
2. Oduzima se „NINO-HA“ d.o.o. Doboj Jug status kvalifikovanog proizvođača u objektu solarne fotonaponske elektrane „KONAK“, utvrđen Rješenjem broj 06-03-994-06/19 od 06.02.2020. godine.
3. Imalac dozvole iz tačke 1. ovog rješenja obavezan je platiti neizmirenu dospjelu obavezu po osnovu regulatorne naknade za 2023. godinu za period važenja dozvole za rad u 2023. godini u iznosu od 135,62 KM u roku od 30 dana od dana primanja ovog rješenja.
4. Ovo rješenje je konačno, te se objavljuje na oglasnoj tabli i internet stranici FERK-a, a dispozitiv ovog rješenja u „Službenim novinama Federacije BiH“.
5. Stupanjem na snagu ovog rješenja prestaje važiti Rješenje broj 06-03-994-06/19 od 06.02.2020. godine, kojim je izdata Dozvola za rad za proizvodnju električne energije broj 06-03-994/19.

### **O b r a z l o ž e n j e**

Članom 21. stav (1) tačka 9) Zakona o električnoj energiji u Federaciji Bosne i Hercegovine propisano je da je nadležnost FERK-a izdavanje, obnova, prenos ili oduzimanje dozvola za proizvodnju, distribuciju, snabdijevanje, trgovinu električne energije i operatora za obnovljive izvore energije i kogeneracije. Članom 84. stav (3) Zakona propisano je da je imalac dozvole dužan ispunjavati obaveze utvrđene dozvolom za rad, dok je članom 87. stav (2) Zakona propisano da

FERK izdaje, obnavlja, prenosi ili oduzima dozvole za rad u skladu sa procedurama propisanim posebnim aktima FERK-a, poštujući načelo hitnosti postupka.

Članom 38. Pravilnika za izdavanje dozvola propisano je da se postupak obnove, izmjene i dopune, prenosa i oduzimanja dozvole za rad može pokrenuti na zahtjev imaoaca dozvole i na vlastitu inicijativu FERK-a, dok je članom 42. stav (1) tačka c) i tačka h) istog pravilnika propisano da FERK može oduzeti dozvolu za rad ukoliko imalac dozvole ne pruža FERK-u zahtijevane informacije i podatke u periodu važenja dozvole za rad neophodne za obavljanje poslova iz nadležnosti FERK-a i ne plati regulatornu naknadu. Također, članom 43. ovog pravilnika propisano je da se postupak obnove, izmjene i dopune, oduzimanja i prenosa dozvole, osim prenosa dozvole za rad iz člana 41. stav (1) tačka a) pravilnika, vodi na isti način kao i postupak izdavanja dozvole, ali i da ukoliko su u zahtjevu za pokretanje postupaka navedene činjenice ili podneseni dokazi na osnovu kojih se može utvrditi stanje stvari ili ako se to stanje može utvrditi na osnovu opštepoznatih činjenica ili na osnovu službenih podataka kojima FERK raspolaže, ovi postupci se mogu provesti i donijeti odluka o podnesenom zahtjevu bez održavanja javne rasprave.

Članom 17. Pravilnika o sticanju statusa kvalifikovanog proizvođača električne energije propisano je da se obnova, prenos i oduzimanje statusa kvalifikovanog proizvođača pokreće na zahtjev kvalifikovanog proizvođača, dok se oduzimanje statusa kvalifikovanog proizvođača može pokrenuti i na inicijativu FERK-a, kao i da se postupak obnove, prenosa i oduzimanja statusa kvalifikovanog proizvođača vodi na isti način kao i postupak sticanja statusa kvalifikovanog proizvođača, odnosno u skladu sa članovima 9., 10., 11., 12. i 14. tog pravilnika. Članom 21. tačka a) istog pravilnika propisano je da FERK može oduzeti status kvalifikovanog proizvođača u slučaju ako se kvalifikovanom proizvođaču oduzme dozvola za rad za proizvodnju električne energije.

FERK je Rješenjem broj 06-03-994-06/19 od 06.02.2020. godine izdao imaoocu dozvole „NINO-HA“ d.o.o. Doboj Jug Dozvolu za rad za proizvodnju električne energije broj 06-03-994/19. Tačkom 4.9. navedene dozvole propisano je da je imalac dozvole obavezan informisati FERK o eventualnim promjenama vezanim za vlasništvo nad proizvodnim objektom, dok je tačkom 16. dozvole propisano da je imalac dozvole obavezan plaćati regulatornu naknadu u periodu važenja te dozvole na način i u iznosu koji utvrdi FERK posebnom odlukom.

U vezi navedenog, FERK je utvrdio da imalac dozvole „NINO-HA“ d.o.o. Doboj Jug nije postupio blagovremeno po tački 4.9. dozvole, te informisao FERK o eventualnim promjenama vezanim za vlasništvo nad proizvodnim objektom odmah po nastanku promjena, nego je to učinio Dopisom primljenim u FERK 03.05.2023. godine pod brojem 06-13-5-869-1/23, uz koji je dostavio kopiju Ugovora o kupoprodaji nekretnina broj: OPU-IP 139/2020 od 18.02.2020. godine. Također, imalac dozvole nije ispunio uslov iz tačke 16. dozvole, a u vezi sa članom 31. Zakona o električnoj energiji u Federaciji Bosne i Hercegovine, odnosno nije platio prvi dio privremene regulatorne naknade za 2023. godinu u iznosu od 150,00 KM, što je bio u obavezi u skladu sa Odlukom o privremenoj regulatornoj naknadi za imaoce dozvola za obavljanje elektroprivrednih djelatnosti i imaoaca dozvole za rad Operatora za OIEiEK za 2023. godinu („Službene novine Federacije BiH“ broj 102/22). U vezi sa navedenim, istom je dostavljena Opomena broj 06-13-5-645-1/23 od 10.03.2023. godine. Međutim, nakon dostavljanja ove Opomene FERK je donio Rješenje broj 08-11-759-1/23 („Službene novine Federacije BiH“ broj 26/23) kojim je, između ostalih, i imaoocu dozvole „NINO-HA“ d.o.o. Doboj Jug utvrdio iznos regulatorne naknade za 2023. godine, sa rokom za plaćanje prvog dijela iste do 30.04.2023. godine. S tim u vezi imalac dozvole nije platio prvi dio regulatorne naknade za 2023. godinu u iznosu od 150,00 KM, što je bio u obavezi u skladu sa navedenim rješenjem. Uvidom u svoju evidenciju FERK je utvrdio da je „NINO-HA“ d.o.o. Doboj Jug primio navedeno rješenje 07.04.2023. godine, ali do 18.05.2023. godine uplata nije izvršena.

Zbog navedenog, u skladu sa članom 42. stav (2) i članom 47. tačka a) Pravilnika za izdavanje dozvola FERK je imao dozvole „NINO-HA“ d.o.o. Doboj Jug 18.05.2023. godine pod brojem 06-13-5-915-1/23 uputio Opomenu, kojom je istom ostavljen rok od osam dana od prijema opomene da postupi po tačkama 4.9. i 16. izdate Dozvole za rad za proizvodnju električne energije broj 06-03-994/19, odnosno:

- da dostavi detaljno obrazloženje razloga zbog kojih nije informisao FERK o promjenama vezanim za vlasništvo nad proizvodnim objektom odmah po nastanku promjena,
- da izvrši plaćanje dugovanja po osnovu regulatorne naknade u iznosu od 150,00 KM,
- da dostavi i detaljno obrazloženje razloga neplaćanja regulatorne naknade za 2023. godinu.

U istoj opomeni imalac dozvole je upućen da će FERK, u slučaju da isti ne otkloni navedene nedostatke u datom roku, pokrenuti postupak oduzimanja predmetne dozvole u skladu sa članom 42. stav (3) Pravilnika za izdavanje dozvola.

Imalac dozvole „NINO-HA“ d.o.o. Doboj Jug je predmetnu opomenu primio 20.05.2023. godine, ali u ostavljenom roku nije postupio po navedenoj opomeni, niti je u FERK dostavio bilo kakvo obrazloženje vezano za navode iz iste.

FERK je imao dozvole „NINO-HA“ d.o.o. Doboj Jug 22.05.2023. godine pod brojem 06-13-5-869-2/23 uputio i dopis vezan za informaciju primljenu u FERK 03.05.2023. godine pod brojem 06-13-5-869-1/23 o prodaji solarne fotonaponske elektrane „KONAK“ i pripadajućeg zemljišta na kojem je ista izgrađena, kojim ga je detaljno uputio u postupak prenosa dozvole za rad i istovremeno podsjetio da nije platio regulatornu naknadu za I. polugodište 2023. godine, u vezi koje mu je FERK prethodno uputio gore navedenu Opomenu broj 06-13-5-915-1/23 od 18.05.2023. godine. Istim dopisom je imao dozvole „NINO-HA“ d.o.o. Doboj Jug jasno naglašeno da će FERK, ukoliko ne izvrši plaćanje dugovanja po osnovu regulatorne naknade, po službenoj dužnosti pokrenuti postupak oduzimanja dozvole za rad za proizvodnju električne energije, u kojem slučaju se postupak prenosa dozvole za rad za proizvodnju električne energije na novog vlasnika neće moći provesti.

Imalac dozvole „NINO-HA“ d.o.o. Doboj Jug je predmetni dopis primio 23.05.2023. godine, ali ni po navedenom dopisu nije postupljeno.

Na osnovu naprijed navedenog FERK je utvrdio sljedeće:

Prilikom izdavanja Dozvole za rad za proizvodnju električne energije broj 06-03-994/19 „NINO-HA“ d.o.o. Doboj Jug, FERK je postavio određene uslove imao dozvole, u skladu sa ovlaštenjima iz člana 87. Zakona o električnoj energiji u Federaciji Bosne i Hercegovine. Međutim, suprotno postavljenim uslovima u tačkama 4.9. i 16. dozvole za rad „NINO-HA“ d.o.o. Doboj Jug nije:

- dostavio detaljno obrazloženje razloga zbog kojih nije informisao FERK o promjenama vezanim za vlasništvo nad proizvodnim objektom odmah po nastanku promjena,
- izvršio plaćanje dugovanja po osnovu regulatorne naknade u iznosu od 150,00 KM,
- dostavio detaljno obrazloženje razloga neplaćanja regulatorne naknade za 2023. godinu.

Kako imalac dozvole nije otklonio nedostatke navedene u Opomeni broj 06-13-5-915-1/23 od 18.05.2023. godine, stekli su se uslovi za oduzimanje dozvole u skladu sa članom 21. stav (1)

tačka 9) i članom 87. stav (2) Zakona o električnoj energiji u Federaciji Bosne i Hercegovine, te članom 42. stav (1) tačka c) i tačka h) i stav (3) Pravilnika za izdavanje dozvola, a slijedom toga i uslovi za oduzimanje statusa kvalifikovanog proizvođača istom imaoocu dozvole u objektu solarne fotonaponske elektrane „KONAK“ u skladu sa članom 21. tačka a) Pravilnika o sticanju statusa kvalifikovanog proizvođača električne energije.

Dalje, Rješenjem FERK-a broj 08-11-759-1/23 od 31.03.2023. godine („Službene novine Federacije BiH“ broj 26/23) je, između ostalih, i „NINO-HA“ d.o.o. Doboj Jug kao imaoocu Dozvole za rad za proizvodnju električne energije broj 06-03-994/19, u tački 42. utvrđen fiksni dio regulatorne naknade za 2023. godinu u iznosu od 300,00 KM i varijabilni dio regulatorne naknade za 2023. godinu u iznosu od 0,00 KM, odnosno ukupna regulatorna naknada za 2023. godinu u iznosu od 300,00 KM. U skladu sa članom 9a. Pravilnika o metodologiji i načinu obračuna regulatornih naknada za imaoce dozvola, imaocima dozvola za obavljanje elektroprivrednih djelatnosti i Operatoru za OIEiEK, kojima se vrši oduzimanje dozvole, iznos regulatorne naknade preračunava se pojedinačnim rješenjem u skladu sa periodom važenja dozvole u tekućoj godini. S obzirom na navedeno, a kako „NINO-HA“ d.o.o. Doboj Jug nije postupio u skladu sa FERK-ovim obavještenjem o obavezi plaćanja, regulatorna naknada za 2023. godinu je preračunata i ista sada iznosi 135,62 KM, o čemu će se „NINO-HA“ d.o.o. Doboj Jug ispostaviti posebno obavještenje.

Slijedeći navedeno, te s obzirom da se stanje stvari može utvrditi na osnovu službenih podataka kojima FERK raspolaže, iz kojih razloga je postupak proveden bez objave obavještenja za javnost i bez održavanja javne rasprave u skladu sa članom 43. stav (2) Pravilnika za izdavanje dozvola, odlučeno je kao u dispozitivu rješenja.

#### **POUKA O PRAVNOM LIJEKU:**

Protiv ovog rješenja može se tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana primanja rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

**v.d. PREDsjedNIKA FERK-a**  
**Mile Srdanović, s.r.**